

Criminal Law Reforms Awareness Project (CLRAP)

फौजदारी कनून सुधार प्रोजेक्ट जागरती (सी.एल.आर.ए.पी.)

[एह पेज अखीरी बार भारती मानक समें (IST) अनुसार 6 अगस्त 2020 गी बड़लै 12:30 बजे अपडेट कीता गेआ ह। किरपा करियै इस जानकारी गी बिना कुसै बंधशें इत्थुआं कापी करियै, एहदी नकल बनाइयै इसी प्रसारत करो।]

इस वेबसाइट दा उद्देश गृह मंत्रालय आसेआ गठित [फौजदारी कनून च सुधार लेई कमेटी](#) दी टीका-टिप्पणी गी इक थाहर कठेरना ऐ ते प्रसारत करना ऐ। कमेटी लेई आदेश साफ नेई ऐ, पर एह साफ ऐ जे एहदा उद्देश भारत च फौजदारी कनून च दरेडे बदलाए दी सफारश करना ऐ। एह भारत दे हर माहनू लेई गंभीर नतीजे होइन जेहूडे फौजदारी कनून दे अधीन न, भाएं ओह अपराध दे शकार दे रूप च जां इक मुलजम दे रूप च जां सिर्फ इक ऐसे माहनू दे रूप च, जेहूडा इक न्यायपूर्ण ते अमन पसंद समाज च रौहना चांहदा ऐ। एहूदे अलावा, फौजदारी न्यांऽ प्रणाली लोकें गी बक्ख-बक्ख ढंगे कन्नै मतासर करदी ऐ। धार्मिक अल्पसंख्यक, कन्नै गै गरीब, दलित ते आदिवासी समुदायें गी पुलिस हिंसा दे राहें, लम्में समें तगर बचार-अधीन हिरासत, सखता सजा ते खराब कनूनी नुमायंदगी राहें फौजदारी न्यांऽ प्रणाली दा खामियाजा भुगतना पौंदा ऐ। जनानियें, खुसरें ते यौन अल्पसंख्यकें, जेहूडे लिंग अधारत हिंसा गी भोगदे न, गी अक्सर फौजदारी न्यांऽ प्रणाली आसेआ नराश कीता जंदा ऐ। साढे च हर इक लेई ते खास रूप कन्नै साढे समाज दे सभनें थमां हाशिये पर रौहने आहलें सदस्यें लेई फौजदारी कनून च सुधार दे असर दे गी दिखदे होई एह जरूरी ऐ जे अस समझचै जे केहू कीता जा करदा ऐ। एह वेबसाइट मजूदा समें च कीते जा करदी सुधार प्रक्रिया कन्नै जुडी दी समस्याएं गी समझने च साढी मदद करने लेई ऐ।

इस पेज पर, अस कमेटी दी बनतर ते कम्मकाज लेई मुख् अतराजें दा सार देयै करने आं। एहू चैंता मुख् रूप कन्नै कमेटी दी गैर-नुमायंदगी आहली बनतर, एहूदे बहिश्कारण तरीके, एहूदे कम्म करने दे ढंग दी अस्पष्टता, पुच्छे गे सुआलें दे डजैन ते इस कम्मै गी पूरा करने दी घट्ट समें सीमा कन्नै सरबंधत न। असें अपनियें चैंताएं पर इक चाल्ली कन्नै चर्चा करने दी कोशिश कीती ऐ, जेहूडी सभनें लेई पुज्ज च ऐ, भाएं उं'दे कोल कनूनी सखलाई होऐ जां नेई। साढा उद्देश इस गल्लै गी मजबूत करना ऐ जे इस कमेटी दा कम्मकाज इक जनहित मुद्दा ऐ, जेहूदे बारे च असें सभनें गी फिकरमंद होना चाहिदा।

जिसलै कि कमेटी दा घोशत उद्देश संविधानक मुल्लें गी तरजीह देने ते माहनूएं, समुदायें ते राष्ट्र दी सुरक्षा गी ध्यान च रखदे होई सुधार गी संदर्भत करदा ऐ, पर एहू डर आहले समें दे दरान औंदा ऐ। देश दे लोक आलमी कोविड-19 महामारी कन्नै पीड़त न, जेहूदे दरान सरकार ने पैहलें थमां गै नागरकें दे श्रम, चपासम ते जमीन अधिकारें पर असर पाने आहले सुधारें दी इक लड़ी पेश कीती ऐ। सरकार चोनमें तौर पर सख्त फौजदारी कनूनें (जियां कि राष्ट्री सुरक्षा ऐक्ट 1980 (NSA) ते गैर कनूनी गतिविधियां रोकथाम ऐक्ट 1967 (UAPA) दी बरतून कारजकर्ताएं, विद्यार्थियें, अल्पसंख्यकें ते शिक्षाविदे दे खलाफ बी करै करदी ऐ। इस पछौकड करियै, एहू बड़ा म्हत्त्वपूर्ण ऐ जे फौजदारी कनून दे बक्ख-बक्ख पैहलुएं गी बद्धो-बद्ध पारदर्शिता ते जवाबदेही कन्नै सुधारने लेई इक व्यापक जनादेश आहली कमेटी निरपक्खता ते न्यांऽ दे मुल्लें गी बनाई रक्खै। जिसलै कि फौजदारी कनून दे बक्ख-बक्ख पैहलुएं च सुधार जरूरी न, इस कमेटी कन्नै ख'ल्ल दित्ते जा करदे मुद्दे इसी इस काबिल नेई बनांदे जे एहू अपने कर्तब्वें दा स्टेई ढंगे कन्नै निरबाह करने च समर्थ होगा।

1. अस्पष्टता

- a. गठित करने दे बाद कमेटी बनाने दे उद्देश दियां शर्ता सार्वजनक नेई कीतियां गेइयां ना। एह कमेटी दे कारजें ते सफारशें लेई रूपरेखा स्थापत करदियां न ते एह समझने लेई जरूरी ऐ जे कमेटी केह करने दी हकदार ऐ/नेई ऐ।
- b. कमेटी ने सलाह दी प्रक्रिया दे दरान हासल सभनें परतें गी प्रकाशत करने दा बचन नेई दित्ते दा ऐ। कमेटी दी अंतम रपोर्ट च गलत सूचना ते जानकारी दी त्रुटि-मरोड गी रोकने लेई एह म्हत्त्वपूर्ण ऐ।

2. समें-सीमा

- a. कमेटी कोविड-19 आलमी महामारी दे दरम्यान स्थापत कीती गेई ही। लिखने दे बेल्लै, दुनिया दे कुसै बी होर देश च (संयुक्त राज्य अमेरिका ते ब्राजील गी छोड़ियै) भारत दी तुलना च कोरोनावायरस दे मामलें दी गिनती मती नेई ऐ। भारती बसनीक इस हालात दे केई नकारात्मक असरें थमां बचने दी कोशिश करै करदे न, जेहदे च सार्वजनक सेहत स्हूलतें दे बुनियादी ढांचे पर भारी दबाव ते बेरुजगारी दी बढ़ी दर शामिल ऐ। इस बेल्लै हितधारकें थमां एहदे च बधी-चड़ियै शमूलियत दी कन्नै मेद करना मुमकन नेई ऐ।
- b. वेबसाइट दे अनुसार, कमेटी दा उद्देश फौजदारी कनूनें च सुधार दियां सफारशां करना ऐ, जेहदे च तत्त, सबूत ते प्रक्रियात्मक कनून शामिल ना। बदले च इनें कोटियें चा हर इक दा व्यापक खेत्तर ऐ। मसाल दे तौर पर, [मौलक कनूनें पर धारा](#) च शामिल ऐ जे कियां अपराधें गी परिभाशत कीता जाना चाहिदा; केहडे आचरण गी अपराधक मन्नेआ जाना चाहिदा; कुसलै कुसै गी अपराध करने दे इरादे दे बिना दंडत कीता जाई सकदा ऐ; केहडे हालातें च इक माहनु जुर्म करने दी कोशिश लेई जवाबदेह बनी सकदा ऐ; जिसलै कोई दोशी पाया जंदा ऐ तां राज्य गी कियां जवाब देना चाहिदा; कुसलै जुर्म दे सारे तत्त मजूद होने दे बावजूद मुद्दाले गी बरी कीता जाना चाहिदा; भारती दंड संहिता 1860 (IPC) दे तैहूत केहडियां परिभाशां संशोधत करनियां चाहिदियां; कुसलै निश्क्रियता गी दंडत कीता जाना चाहिदा; आईपीसी दे तैहूत अपराधें दी दरजेबंदी कियां कीती जा ते इऐ जनेह होर सुधार जेहडे जरूरी होई सकदे ना। ते एह छे सुआलनामें दी इक लडी राहें कमेटी आसेआ समीक्षा कीती जा करदी कनून दी त्रुटि कोटियें चा इक ऐ। फही बी, सबूरे सलाह-मशवरे दे इस कम्म दा खातमा करीब त्रुटि म्हीनें [4 जुलाई 2020 थमां 9 अक्टूबर 2020 तगर](#) च कीता जाना ऐ। कमेटी ने छे सुआलनामें दे जवाब पेश करने लेई ओवरलैपिंग समें-सीमा नरधारत कीती ऐ, जेहदे च कुल 300 थमां मते सुआलें दे होने दा इमकान ऐ। एह न ते यथार्थवादी ऐ ते न गै लोडचदा ऐ जे इन्ने घट्ट समें च पूरी फौजदारी न्यां बवस्था दे कायापलट पर बचार कीता जा। आम हालातें च बी, त्रै म्हीने दे अंदर नागरकें गी इनें बदलाएं दे बस्तार कन्नै जोडना औक्खा होगा। इक महामारी दरान, एह लगभग नामुमकन ऐ। दित्ते गेदे संदर्भ अनुसार, तुलनात्मक पैमाने दे फौजदारी न्यां सुधारें कन्नै सरबंधत पैहली कमेटी, मलीमठ कमेटी गी अपनी रपोर्ट तैयार करने च ढाई बर्रे लगगी गे हे।

3. सुआलनामें

- a. सुआलनामें लम्में-चौडे ना। मसाल दे तौर पर, छे सुआलनामें चा पैहूले च 46 सुआल शामिल ना। फ्ही बी, कमेटी आसेआ सुआलनामें च चि'न्नत खेत्तरें च सुधार दी लोड जां संदर्भ पर कोई रेहबरी नेई दिक्ती गई ऐ। केहूडे अधार पर कमेटी ने फैसला लैता ऐ जे कनून दे इ'नें खेत्तरें च सुधार दी लोड होई सकदी ऐ?
- b. सुआलनामें गी बडे माडे ढंगै कन्नै घडेआ गेदा ऐ। अर्थ जां ते अस्पष्ट जां समझ थमां बाहर ऐ ते कदे-कदे सुआलें कन्नै बेकार दे लाने लांदे ना। इस्तेमाल कीती गई भाशा जकीनी रूप कन्नै उ'नें लोकें लेई सैहल नेई ऐ, जिंदे कोल कनूनी शिक्षा दा लाहू नेई ऐ। दिक्ते गे उदाहरण इ'नें नुक्ते गी समझाने च मदद करडन।

कमेटी दे सुआलनामें च गल्लियें दा चित्तरण: 'बाज़ाबता देनदारी'

जारी कीते गे पैहले सुआलनामें चा इक सुआल ऐ, अपराध दी वस्तु ते किसम बारै केहडे सिद्धांत आई.पी.सी दे अंदर बाज़ाबता देनदारी आहूले अपराधें दी भूमका दी रैहूबरी करदे न? कनूनी बरादरी दे बाहर केई लोके गी एह पता नेई होग जे बाज़ाबता देनदारी दा भार केहू ऐ। नां गै कमेटी इस गल्लै दी कोई सारत दिंदी ऐ जे ओह 'बाज़ाबता देनदारी' गी कि'यां समझदी ऐ। इस शब्द गी थोहड़ा समझने लेई: आमतौर पर, इक कारज गी सिर्फ उसलै अपराध मन्नेआ जंदा ऐ जिसलै मुदाला जानी-बुज्जियै जां बर्जत नतीजा आहनने दे इरादे कन्नै उस कारजै गी करदा ऐ। मुट्टे तौर पर, बाज़ाबता देनदारी अपराध ओह न जित्थै कारज करने आहूले माहनू दा इरादा बेमतलब ऐ। मसाल दे तौर पर, जेकर कोई चैक बाउंस होंदा ऐ, तां चैक जारी करने आहूले माहनू गी सिर्फ इसलेई नेई बरी कीता जंदा ऐ कीजे उन्नै चैक दा अनादर करने दा इरादा नेई कीता हा। इसै चाल्ली, ओवर स्पीड करने आहूले माहनू गी कनूनी कारवाई थमां छूट नेई दित्ती जाहूग कीजे ओह इजाजत दित्ती गेई स्पीड थमां मती ड्राइव करने दा इरादा नेई रखदा हा। हालांके, इस बारे च कोई कनून च कोई ऐग्रीमेंट जां स्कालरशिप नेई ऐ जे बाज़ाबता देनदारी दी इस अवधारणा दियां हदां केहू ना। जेकर मुदाले आसेआ अपराध X जानी-बुज्जियै दे बजाए लापरवाही कन्नै कीता जाई सकदा ऐ, तां किश लोक आक्खडन जे एह इक बाज़ाबता देनदारी अपराध ऐ। होर लोक आक्खडन जे कनून बाज़ाबता देनदारी गी सिर्फ उत्थै लागू करदा ऐ, जित्थै एह इक मुदाले गी दंडत करदा ऐ जेहड़ा कि दोशपूर्ण ढंगै कन्नै कम्म नेई करै करदा हा। इस बचाराधारा गी मन्नने आहूले दे अनुसार, इक लापरवाहू मुदाला दोशपूर्ण ढंगै कन्नै कम्म करदा ऐ, इसलेई अस अपराध X गी इक बाज़ाबता देनदारी दे रूप च संदर्भत नेई करी सकने आं। इस नुक्ते पर कमेटी कन्नै बचार नामुमकन ऐ, बिना एह जाने जे ओह बाज़ाबता देनदारी कियां समझदे ना। एहदे अलावा, एह सुआल इस धारणा पर अगगै बधदा ऐ जे बाज़ाबता देनदारी किश हालातें च मंजूर ऐ ते फही एह कदूं/ कीहू पेश कीता जा, एहदे पर प्रतिक्रिया मंगदा ऐ। इक बाज़ाबता देनदारी अपराध दे संजीदा नतीजे गी दिखदे होई-जिसलै थुआडा किश बी गलत करने दा इरादा नेई हा, अदूं बी दोशी ठरहाया जाना- एह बडी चैता दा विशे ऐ। इक समस्या खेत्तर दे रूप च, आई.पी.सी. च बाज़ाबता देनदारी अपराधें दी गैर-मजूदगी दी पंछान करने लेई केहड़ी शोध कीती गेई ही, एह दस्सने लेई कमेटी दी वेबसाइट पर कोई डेटा दस्तयाब नेई ऐ।

- c. कमेटी ने क्रमवार तरतीब च सुआलनामां जारी करने दी योजना बनाई ऐ, पैहलें तत्त थमां, फही प्रक्रिया थमां ते अखीर च सबूत थमां। कनून दे इ'नें खेत्तरें कन्नै तरतीब कन्नै निब्वडना व्यहारक नेई ऐ कीजे ओह सब्भै इक साथें कनून दे अमल राहें बज्जे दे ना। मुट्टे तौर पर, मौलक फौजदारी कनून दस्सदा ऐ जे अपराध केहू ऐ। जाबता ते प्रमाणक कनून एह मन्नदे न जे अदालत च अपराध कि'यां साबत होंदा ऐ। हितधारक नमें अपराधें गी जोड़ने जां मजूदा अपराधें दा सुझाव देना चाही सकदे न, पर इस शर्त पर जे परख दी निरपक्खता दी गरांटी देने आहूले जाबती ते प्रमाणक सुरक्षा उपाएं दा

सम्मान कीता जा। इक दूए थमां अलगाव च तत्त, जाबता ते सबूत दे बारे च सफारशां करना मुमकन नेई ऐ।

4. जाबता

- a. कमेटी दे बारे च जानकारी मुख रूप कन्नै ओहदी अपनी वेबसाइट पर दिती गई ऐ। कमेटी कन्नै सलाह-मशवरा आनलाइन संसाधनें तगर पुज्ज बनाने, उं'दे राहें नेविगेट करने दा तरीका जानना ते वेबसाइट दी संचालत करने आहली भाशा (अंगरेजी) गी समझने पर मनहस्सर ऐ। भाशाएं दी बड़ी मती बहुलता ते घट्ट इंटरनेट दी पुज्ज दी खासयित आहले देश च सभनें थमां बधिया समें च बी एह बक्ख-बाहरी प्रक्रियां ना। शायद इस असलियत दे सभनें थमां भद्दे अवशेश रपोर्ट दे रूप च न जे महामारी दे दरान भारती विद्यार्थियें दी मौत आनलाइन क्लासें तगर पुज्ज बनाने च नकाम होने दे नतीजतन होई ऐ।

5. बनतर

- a. कमेटी च सिर्फ पंज मैबर शामिल न, जिं'दे च सभनें कोल फुल-टाइम नौकरियां ना। एह दिखदे होई जे कमेटी दे कम्मकाज दी समें-सीमा किन्नी घट्ट ऐ, असेंगी नेई लगदा जे कमेटी लेई फुल-टाइम मैबरें दे बिना म्हारत कन्नै ते लोकतांत्रिक रूप कन्नै अपने कम्म दा निरवाह करना मुमकन ऐ।
- b. इ'यां लगदा ऐ जे नसली, लैंगिक, लिंग, धार्मिक जां जाति दे अल्पसंख्यके थमां कमेटी च कोई नुमायंदगी नेई ऐ। जित्थूं तगर अस दस्सी सकने आं, कम्मकाजी तबके जां विकलांग समुदायें दी कोई नुमायंदगी नेई ऐ। चलो संघर्ष आहले खेत्तरें गी छोड़ी दित्ता जा, उत्तर भारत च इक सीमत भगौलक खेत्तर दे बाहर स्थित कमेटी च कोई मैबर नेई ऐ। नागरक समाज संगठनें दी कोई नुमायंदगी नेई ऐ जेहडे इ'नें हाशिये आहले समूहें कन्नै कम्म करदे न, जिं'दे चा मते सारे पुलिस दे घेरे च न ते सुरक्षा-अधीन ना। जेहडे लोक फौजदारी कनून थमां सभनें थमां मते मतासर होंदे न, उं'नेंगी लोकतांत्रिक वैधता लेई प्रक्रिया दा हिस्सा बनाया जाना चाहिदा ते एह जकीनी कीता जा जे सुधार प्रक्रिया सार्थक ते असरदार ऐ। मसाल दे तौर पर, कमेटी ने बचार कीता ऐ जे क्या आई.पी.सी. दे तैहूत परिवार गी कलंक थमां बचाने लेई कीती गई हत्या (आनर किलिंग) गी चेचा अपराध बनाया जाना चाहिदा ते इसी दंडत कि'यां कीता जाना चाहिदा। परिवार गी कलंक थमां बचाने लेई कीती गई हत्या (आनर किलिंग) गी आमतौर पर जाति, धर्म जां लिंग दे अधार पर सत्ता ढांचा गी बनाई रक्खने लेई कीता जंदा ऐ। इस चाल्ली इस मुद्दे पर उनें मैबरें गी शामिल कीते बिना जेहडे हाशिये पर होने दी गल्ल करी सकदे न, सुधार दी शरुआत करना बे-लोडचदा ऐ।
- c. कनून दे विवाद आहले खेत्तरें दी जांच दे सटीक उद्देश लेई ते जनता कन्नै व्यापक सलाह मशवरे दे बाद सुधारें दी सफारश करने लेई भारती कनून आयोग मजूद ऐ। कनून आयोग दे संदर्भ दे बिना इस पद्धर पर ते इस म्हत्तव दे कम्मै गी इक बाहरी कमेटी दे सपुर्द करने दा कोई औचित्य नेई ऐ।

उप्पर कीती गई अलोचना दी लोई च, एह म्हत्तवपूर्ण ऐ जे कमेटी फौरन अपना कम्म करना बंद करी देयै। जेकर फौजदारी कनून च सुधार पेश कीते जाने न, तां एह इक नुमायंदा कमेटी आसेआ मनासब सलाह मशवरे, स्हेई ढंगै कन्नै, समावेशी ते पारदर्शी प्रक्रिया दा पालन करदे होई कीता जाना चाहिदा ते सिर्फ अदू जिसलै इक बारी कोविड-19 महामारी दे बनाशकारी असर खत्म होई गेदे होना।

